



Comhairle an
Aontais Eorpaigh

An Bhruiséil, 7 Iúil 2026
(OR. en)

10873/26

Comhad Idirinstitiúideach:
2026/0153(NLE)

FISC 227
ECOFIN 861
ENER 423

GNÍOMHARTHA REACTACHA AGUS IONSTRAIMÍ EILE

Ábhar: CINNEADH CUR CHUN FEIDHME ÓN gCOMHAIRLE lena n-údaráítear an Chróit le rátaí laghdaithe dleachta máil a chur i bhfeidhm maidir le gás ola agus peitreal gan luaidhe a úsáidtear mar bhreoslaí d'fheithiclí, de bhun Airteagal 19 de Threoir 2003/96/CE

CINNEADH CUR CHUN FEIDHME (AE) 2026/... ÓN gCOMHAIRLE

an ...

lena n-údaraítear an Chróit le rátaí laghdaithe dleachta máil a chur i bhfeidhm maidir le gás-ola agus peitreal gan luaidhe a úsáidtear mar bhreoslaí d'fheithiclí, de bhun Airteagal 19 de Threoir 2003/96/CE

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh,

Ag féachaint do Threoir 2003/96/CE ón gComhairle an 27 Deireadh Fómhair 2003 lena ndéantar athstruchtúrú ar chreat an Comhphobail maidir le cánachas ar tháirgí fuinnimh agus ar leictreachas¹, agus go háirithe Airteagal 19 (1) de,

Ag féachaint don togra ón gCoimisiún Eorpach,

¹ IO L 283, 31.10.2003, lch. 51, ELI: <http://data.europa.eu/eli/dir/2003/96/oj>.

De bharr an mhéid seo a leanas:

- (1) Sna seachtainí roimh ghlacadh an Chinnidh seo, tugadh faoi deara arduithe géara leanúnacha ar phraghsanna mórdhíola agus miondhíola táirgí fuinnimh ar fud an Aontais, arna spreagadh ag na forbairtí geopholaitiúla sa Mheánoirthear, a raibh tionchar acu ar shlabhraí soláthair ola agus táirgí ola ar fud an domhain. Bhí éifeachtaí díobhálacha suntasacha ag na forbairtí sin ar theaghlaigh, go háirithe ar thomhaltóirí leochaileacha, agus ar ghnóthais, lena n-áirítear fiontair bheaga agus mheánmhéide, agus ar an gcaoi sin tá riosca tromchúiseach ag baint leo don chomhtháthú sóisialta, don chobhsaíocht eacnamaíoch agus d'fheidhmiú cuí an mhargaidh inmheánaigh.
- (2) Sna Conclúidí uaithi an 19 Márta 2026, d'aithin an Chomhairle Eorpach cineál urghnách na staide sa mhargadh fuinnimh agus na himpleachtaí maicreacnamaíocha a bhaineann leis. D'iarr an Chomhairle Eorpach ar an gCoimisiún Eorpach oibriú i ndlúthchomhar leis na Ballstáit chun bearta náisiúnta sealadacha agus spriocdhírthe a cheapadh chun tionchair shuntasacha breoslaí agus comhchodanna gaolmhara den chostas a ghearrtar ar chostais giniúna leictreachais a mhaolú, agus leagadh béim, go háirithe, ar an ngá atá le freagairt chomhordaithe, ós rud é go raibh tionchar láithreach ag an gcoinbhleacht sa Mheánoirthear ar phraghsanna fuinnimh do shaoránaigh agus do ghnólachtaí san Eoraip.

- (3) Dleachtanna máil, arna mbunú le Treoir 2003/96/CE, cuireann siad le costas deiridh na dtáirgí fuinnimh a sholáthraítear san Aontas. Le laghdú ar dhleachtanna máil faoi bhun na n-íosleibhéal cánachais a leagtar amach sa Treoir sin, is féidir cuid de na harduithe ar chostais fuinnimh atá roimh na Ballstáit faoi láthair a mhaolú.
- (4) Leis na solúbthachtaí dá bhforáiltear i dTreoir 2003/96/CE, is féidir leis na Ballstáit, laistigh de theorainneacha sainithe, an t-ualach cánach ar tháirgí sonracha fuinnimh a laghdú ar bhealach spriocdhírithe sealadach. I bhfianaise chineál eisceachtúil práinneach na staid reatha, is gá foráil a dhéanamh maidir le solúbthachtaí sonracha a bhfuil teorainn ama leo agus atá dírithe go sainráite ar thionchar an tsuaite i bpraghsanna fuinnimh a mhaolú.
- (5) Le laghduithe sealadacha ar chánachas ar tháirgí fuinnimh, is féidir faoiseamh tapa a thabhairt do theaghlaigh agus do ghnóthais trí phraghsanna úsáideoirí deiridh a laghdú go díreach. Sa staid reatha, d'fhéadfadh na laghduithe urghnácha sin a bheith ina n-ionstraim oiriúnach agus riachtanach chun aghaidh a thabhairt ar an suaitheadh eacnamaíoch tromchúiseach a eascraíonn as an suaitheadh i bpraghsanna fuinnimh.
- (6) Le litir dar dáta an 2 Aibreán 2026, i gcomhréir le hAirteagal 19 de Threoir 2003/96/CE, d'iarr údaráis na Cróite údarú chun rátaí laghdaithe dleachta máil a chur i bhfeidhm maidir le gás-ola agus peitreal gan luaidhe a úsáidtear mar bhreoslaí d'fheithiclí. Thiocfadh na rátaí laghdaithe sin faoi bhun na n-íosleibhéal cánachais is infheidhme maidir le breosla d'fheithiclí dá dtagraítear in Airteagal 7 den Treoir sin faoi EUR 0,2195 in aghaidh an lítir le haghaidh peitreal gan luaidhe agus faoi EUR 0,225 in aghaidh an lítir le haghaidh gás-ola. Iarradh an t-údarú le haghaidh tréimhse 6 mhí.

- (7) De réir údaráis na Cróite, is é is aidhm do ráta laghdaithe dleachta máil a chur i bhfeidhm tionchair shóisialta agus eacnamaíocha praghsanna arda miondíola peitril agus gás-ola a mhaolú, ar praghsanna iad atá mar thoradh ar an staid gheopholaitiúil agus a dhéanann difear díreach do theaghlaigh agus do chuideachtaí araon.
- (8) Rinne an Coimisiún athbhreithniú ar an údarú a iarradh, agus meastar nach gcuirfidh sé bac ar fheidhmiú cuí an mhargaidh inmheánaigh. I bhfianaise a ghiorra atá an maolú a iarradh agus na n-imthosca eisceachtúla atá nasctha leis an staid gheopholaitiúil mar aon le praghas margaidh thar a bheith ard ar ola, meastar go bhfuil an maolú a iarradh leordhóthanach agus comhréireach i bhfianaise an ghá atá le cothromaíocht idir na cuspóirí sonracha beartais a liostaítear in Airteagal 19(1), an tríú fomhír, de Threoir 2003/96/CE, agus go háirithe beartas comhshaoil an Aontais agus an riachtanas éigeandála atá ann inacmhainneacht fuinnimh a áirithiú do ghnólachtaí agus teaghlaigh.
- (9) Dá bhrí sin, ba cheart an Chróit a údarú chun rátaí laghdaithe dleachta máil atá faoi bhun íosleibhéil an Aontais a chur i bhfeidhm go sealadach maidir le gás ola agus peitreal gan luaidhe a úsáidtear mar bhreoslaí d'fheithiclí.

- (10) De bhun Airteagal 19(2) de Threoir 2003/96/CE, tá gach údarú a dheonaítear faoi mhír 1 den Airteagal sin le bheith teoranta go docht ó thaobh ama de. Mar sin féin, ionas nach ndéanfar dochar d'fhorbairtí a dhéanfar amach anseo ar an gcreat dlíthiúil atá ann cheana, is iomchuí a fhoráil gur cheart, i gcás ina ndéanfaidh an Chomhairle, ag gníomhú di ar bhonn Airteagal 113 den Chonradh ar Fheidhmiú an Aontais Eorpaigh (CFAE) nó aon fhoráil ábhartha eile, íosleibhéil nua chánachais dá dtagraítear in Airteagal 7 de Threoir 2003/96/CE a thabhairt isteach le haghaidh gás-ola agus peitreal gan luaidhe a úsáidtear mar bhreoslaí d'fheithiclí nach n-oiriúnófaí an t-údarú sin dóibh, scoirfeadh an t-údarú sin d'fheidhm a bheith aige ar an dáta a thiocfaidh na híosleibhéil nua chánachais sin chun bheith infheidhme.
- (11) An tráth céanna, bíonn costais fhioscacha mhóra i gceist le lagduithe cánach neamh-spriocdhírthe agus is gnách go méadaíonn siad an t-éileamh ar bhreoslaí iontaise, rud a chuireann leis an éagothroime idir soláthar agus éileamh. Dá bhrí sin, ba cheart an beart a bheith teoranta go docht ó thaobh ama de.
- (12) Tá an Cinneadh seo gan dochar do chur i bhfeidhm rialacha an Aontais maidir leis an Státchabhair,

TAR ÉIS AN CINNEADH SEO A GHLACADH:

Airteagal 1

Údaraítear an Chróit le laghdú a chur i bhfeidhm ar na rátaí suas le EUR 0,225 in aghaidh an lítir faoi bhun na n-íosleibhéal cánachais dá dtagraítear in Airteagal 7 de Threoir 2003/96/CE le haghaidh gás-ola a úsáidtear mar bhreoslaí d'fheithiclí agus EUR 0,2195 in aghaidh an lítir faoi bhun na leibhéal sin le haghaidh peitreal gan luaidhe a úsáidtear mar bhreoslaí d'fheithiclí.

Airteagal 2

Beidh feidhm ag an gcinneadh seo ón 1 Lúnasa 2026 go dtí an 31 Eanáir 2027.

Mar sin féin, i gcás ina ndéanfaidh an Chomhairle, ag gníomhú di ar bhonn Airteagal 113 CFAE nó aon fhoráil ábhartha eile de CFAE, íosleibhéil chánachais nua dá dtagraítear in Airteagal 7 de Threoir 2003/96/CE a thabhairt isteach le haghaidh gás-ola agus peitreal gan luaidhe a úsáidtear mar bhreoslaí d'fheithiclí agus nach ndéanfaí an t-údarú a deonaíodh in Airteagal 1 den Chinneadh seo a oiriúnú leo, scoirfidh an Cinneadh seo d'fheidhm a bheith aige an dáta a thiocfaidh an t-íosleibhéal nua cánachais sin chun bheith infheidhme.

Airteagal 3

Gabhfaidh éifeacht leis an gCinneadh seo an dáta a thabharfar an fógra faoi.

Airteagal 4

Dírítear an Cinneadh seo chuig Poblacht na Cróite.

Arna dhéanamh in/sa ..., ...

Thar ceann na Comhairle

An tUachtarán
